

*Durante un anochi Caribeño masha ameno*

## Padu “Del Caribe” a celebra su 95 cumpleaños delante na BNA

**ORANJESTAD** – Nos Tata di Cultura, Padu “Del Caribe” Lampe a celebra su 95 cumpleaños adelanta durante un anochi cultura dedica na Caribe den Biblioteca Nacional Aruba (BNA) su sede di Oranjestad.

Den cuadro di e actividad aki tur publico presente por a disfruta di un dushi pida di bolo pa celebra Padu su cumpleaños cu ta mañan. Ademá el a ricibi su diploma di Honoris Causa otorga pa Universidad di Zulia hinca den un bunita leishi. E actividad aki a wordo organisa diahuebs anochi pa Biblioteca Aruba, IPA, departamento di Cultura y promotor di Cultura, sr. Mirto Lacle en conexion cu Dia Internacional di Derecho di Autor. Anochi Caribeño  
E anochi cultural aki tabatin



como invitado y orador special di Republica Dominicana, sr. Pedro Ureña Rib. Actualmente e ta residencia na Habana (Cuba) unda e ta fungi como minister y consehero di embahador di Republica Dominicana den e isla aki. E tabata un anochi di declamacion, danza, musica, charla rond e celebracion di e fecha

cu e autornan ta wordo honra, pero tambe un anochi educativo riba e topico di Caribe. Sra. Ruthy Vrieswijk a declama un bunita poesia di su mes inspira riba e instrumento esencial di un autor literario: pen. Ramona Campos Garcia tabatin un muestra folklorico di danza tipico di “Palo Seco”, un danza di origen Indjan di Re-



publica Dominicana compaña cu e percussionista Lisandro Tambora. Un duo musical a sa di deleita e publico entre otro cu e tema musical “Tog Mi Sa” di Rudy Plaatje y “Abo so” di Padu di Caribe kende tabata presente.

### **El Caribe**

Sr. Pedro Ureña Rib a expresa su impresion positivo riba e actividad cultural aki. El a presenta su buki “El Caribe” cu el a traha conhuntamente cu sr. Jean-Paul Duviols. El a bisa cu e trabou literario aki y otro mas cu el a yega di skirbi

ta referi na “e gran Caribe”. Nan a tuma paisnan principalmente di e asociacion Caribeño tanto esun continental como e islanan. Tambe el a bisa cu tin miembro asocia di Caribe, y Aruba ta un di nan asocia na e Asociacion di Estadonan di Caribe, y Francia ta asocia dor di Guyana, Guadalupe y Martinica. El a bisa cu e no tabata na altura cu Antia Hulandes a wordo disolve. El a bin tende di e hecho historico aki awor cu el a bin bishita Aruba. “Biahando nos ta siña”, el a bisa. □